

Dnevni avaz, 28.03.2008.

OHR o plaćama državnih uposlenika **Pravosuđe ne smije biti pod kontrolom vlasti**

Plaće sudija i tužilaca uvijek su bile kamen
spoticanja, kaže Barašanić

Ured visokog predstavnika, Evropska komisija, Svjetska banka i EUPM zabrinuti su zbog namjere da se novim zakonskim rješenjima o plaćama i naknadama u institucijama BiH određuju plaće sudijama i tužiocima, jer bi to nezavisno pravosuđe dovelo pod kontrolu vlasti, izjavio je portparol OHR-a Oleg Milišić.

On je naglasio da bi novim zakonima koji se predlažu na državnom nivou bila ugrožena nezavisnost pravosuđa, SIPA-e, Granične službe i drugih bh. agencija tako što bi Vijeću ministara bilo dato diskreciono pravo kontrole plaća zaposlenih u ovim institucijama.

- OHR, Evropska komisija, Svjetska banka i EUPM zabrinuti su činjenicom da će zakoni podrivati rad institucija koje garantiraju demokratiju u BiH i u narednim danima će uputiti pismo Parlamentu BiH s detaljnim obrazloženjem svoje zabrinutosti - naglasio je Milišić.

Ovaj čin OHR-a pozdravili su brojni predstavnici bh. pravosuđa. Sekretar Ministarstva pravde BiH Jusuf Halilagić kaže da se za poseban zakon ovo ministarstvo zalagalo od početka njegove izrade, ali da on ne zna zašto je odlučeno suprotno.



OHR: Zadiranje u nezavisnost

V.d. glavnog tužioca BiH i predsjednik Udruženja tužilaca FBiH Milorad Barašanić u izjavi za „Dnevni avaz“ iznio je stav da plaće uposlenih u Tužilaštvu i Sudu BiH trebaju i dalje biti regulirane posebnim zakonom, dodajući kako je „očito cilj državnog zakona da se pravosudne institucije stave pod kontrolu“.

- Plaće državnih sudija i tužilaca uvijek su bile kamen spoticanja. Trenutno su tužiocima u BiH meta napada i odstrebla bh. javnosti - rekao je Barašanić. **S. ŠKULETIĆ**